

## **Qeqqata Kommuniani qitsuuteqarnermi ileqqoreqqaq**

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersumi § 13-imi imm. 1 aamma § 28-mi imm. 2 aamma 4 naapertorlugit, Inatsisartut inatsisaatigut nr. 23-atigut, 22. novembari 2011-mi kingullertut allanngortinnejartumi aalajangerneqarpoq:

### **Kapitali 1**

*Aallaggaasiut*

**§ 1.** Ileqqoreqqaq Qeqqata Kommunianut atuuppoq.

### **Kapitali 2**

*Qimminik qimuttoqarfíup iluani avataanilu ataatsimoortumik aalajangersakkat*

**§ 2.** Qeqqata Kommuniani kommunalbestyrelsi allakkatigut akuersissuteqaqqaartillugu Qeqqata Kommuniani qitsuuteqartoqarsinnaavoq.

*Imm. 2.* Qitsuuteqarsinnaanermut akuersissummiq qinnuteqaat Qeqqata Kommuniani Teknikkimut Avatangiisinullu Immikkoortortamut nassiuinneqassaaq.

*Imm. 3.* Akuersissut tunineqartuinnarmut atuuppoq, allanullu tunniunneqarsinnaanani.

*Imm. 4.* Ileqqoreqqaq matuminnga annertuumik arlaleriarlutilluunniit unioqqutsitsimasunut, qitsuuteqarsinnaanermut akuersissummiq tunniussinnginnissaminik kommunalbestyrelsi aalajangiisinnaavoq.

**§ 3.** Maleruagassat qaqugukkulluunniit atuuttut naapertorlugit qitsuit akiuussutissamik kapineqarsimassapput.

*Imm. 2.* Qimminik nakkutilliisup uppermarsaat, akiuussutissamik kapitisisimanermut immersorsimasaa imaluunniit akiuussutissamik kapitissimaneranut uumasut nakorsaata uppermarsaataa uppermarsaatitut atorneqassaaq.

*Imm. 3.* Perlerorsinnaanermut akiuussutissamik kapitissimanermut uppermarsaammik takussutissartalimmik, qitsuit qungasequteqartinneqassapput.

*Imm. 4.* Imm. 3-mi taaneqarluni perlerorsinnaanermut akiuussutissamik kapitissimanermut uppermarsaatip tunuatungaani piginnittup oqarasuaataata normua kigartorlugu allanneqarsimassaaq.

*Imm. 5.* Kigartuut qimminik nakkutilliisumut imaluunniit Teknikkimut Avatangiisinullu Immikkoortortap allatseqarfianut attarsiniarnejqarsinnaavoq.

*Imm. 6.* Allakkatigut akuersissut piginnittumit tigummineqartassaaq, piumasarineqartillugulu takutinneqartassalluni.

**§ 4.** Qitsuit silami angalaannartinneqausaanngillat.

*Imm. 2. Qitsuit illup iluaniisineqassapput imaluunniit silamiisineqassagunik ungalusamiisineqassallutik.*

*Imm. 3. Qitsunnik silamiisitsinissamut ungalusaliornissaq kissaatigigaanni, Teknikkimut Avatangiisinullu Immikkoortortamut nunaminertamik atugassinneqarnissamik qinnuteqartoqassaaq.*

**§ 5.** Qitsuit silami ungalusamiisineqartut panertumik nallavissaqartinneqassapput, soorluttaaq imissaqartinneqartuassasut imaluunniit aputitugassaqassasut.

*Imm. 2. Qitsuit silami ungalusamiisineqartut minnerpaamik ullormut ataasiartumik takusarneqartassapput.*

**§ 6.** Qitsuit illup iluaniisineqartut panertumik nallavissaqartinneqassapput, soorluttaaq imissaqartinneqartuassasut.

**§ 7 .** Qitsuit kinguaassiortinneqaqqusaanngillat.

*Imm. 2. Qitsuit arnavissat nakorsaatitortinneqarnerisigut pilatsinneqarnerisigulluunnit kinguaassiorsinnaajunnaarsinnejarsimassapput.*

*Imm. 3. Qitsuit angutivissat suliaritinnermikkut kinguaassiorsinnaajunnaarsinnejarsimassapput*

*Imm. 4. Qitsummik imaluunniit qitsunnik piginnittup imm. 2 imaluunniit imm. 3 naapertorlugu kinguaassiorsinnaajunnaarsinnejarsimanera imaluunniit kinguaassiorsinnaajunnaarsinnejarsimaneri, kommunimut uppermarsarsinnaassavaa imaluunniit uppermarsarsinnaassavai.*

### Kapitali 3

*Qimminik nakkutilliisoq aamma qitsuit angalaannartut, pigineqanngitsut kiisalu qimminik qimuttoqarfiusp iluani avataanilu unioqqutitsisumik qitsunnik eqqussineq pillugit nalinginnaasumik aalajangersakkat*

**§ 8. Tullinnguuttunik suliaqarnissamik akisussaasussanik qimminik nakkutilliisumik imaluuniit nakkutilliisunik communalbestyrelsi toqqaassaaq:**

- 1) qitsunnik piginnittunik nalunaarsuinerit,
- 2) qitsunnik angalaannartunik, pigineqanngitsunillu kiisalu unioqqutitsisumik eqqussanik qitsuutigineqartunillu toqtsinerit tigusinerilluunniit,
- 3) qitsunnik unioqqutitsisumik eqqussat qitsuutigineqartullu tassaapput, qitsuit kommunimut akuersissutitaqanngitsumik qitsuutigineqartut pineqarput, takuuk § 2,
- 4) qitsunnik akiuussutissamik kapuunerit,
- 5) akiuussutissamik kapuunerit, kapuutillu uninngasuutit nalunaarsorneqarnerat kiisalu taakku uumasut nakorsaannut nalunaarutigineqartarnissaat.

**§ 9. Qitsuit angalaannartut kiisalu qitsuit unioqqutitsisumik eqqussat qitsuutigineqartullu qimminik nakkutilliisunut aatinneqartassapput.**

*Imm. 2.* Uumasunik imm. 1-imi taaneqartunik piginnittooq, pissutsinik iluarsiissuteqarnissaanut piffissalerlugu siumut ilisimatinneqassaaq. Ullunik pingasunik siumut ilimasaaruteqarneq naammattutut isigineqarpoq. Piffissaliunneqartup iluani pissutsit iluarsiivigineqarsimanngippata, siumut ilisimatitsinertaqanngitsumik piginnittumullu taarsiissutitaqanngitsumik qitsuk toquunneqassaaq.

*Imm.3.* Qitsuk angalaannartoq qimminik nakkutilliisumit tiguneqarpat, qitsummik piginnittooq aallersinnaatillugu qitsuk kommunip sannaviani ungalusamiisinneqassaaq. Qimminik nakkutilliisup qitsummik piginnittooq attavigissavaa, ullulu pingasut qaangiutsinnagit piginnittup qitsuutini aasimanngippagu, piginnittumut taarsiissutitaqanngitsumik qitsuk toquunneqassaaq. Patsisissaqarluarluni qitsuk aaneqarsinnaanngippat, qitsuup aaneqarnissaanut piffissaliussap sivitsorneqarnissaanik qimminik nakkutilliisoq isumaqatiginiarneqassaaq.

#### **Kapitali 4** *Maalaaruteqarnerit*

**§ 10.** Qitsuuteqarnermut tunngatillugu maalaarutiginiakkat, kommunalbestyrelsimit nassiunneqartassapput. Malittarisassanut tunngatillugu maalaarutit politiinut nassiunneqartassapput.

#### **Kapitali 5** *Pineqaatissiissutaasinnaasut*

**§. 11.** Ileqqoreqqusamik matuminnga unioqqutitsisoqartillugu, Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni § 28-mi imm. 2 naapertorlugu akiligassiisoqarsinnaavoq.


*Imm. 2.* Ileqqoreqqusamik matuminnga annertuumik arlaleriartumilluunniit unioqqutitsisoqartillugu, Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni § 28-mi imm. 2 naapertorlugu uumasuuteqaaqusaajunnaarsitsisoqarsinnaallunilu uumasunik passussisinnaajunnaarsitsisoqarsinnaavoq.

#### **Kapitali 6** *Atuutilerfia*

**§ 12.** Ileqqorequsaq qaammammi atuuttussanngortinneqarfiusumi atuutilerpoq.

*Imm. 2.* Atuutilernera ilutigalugu Maniitsumi qimmeqarnermut qitsuuteqarnermullu ileqqorequsaq 2005-imi aggustip 17-ianeersoq atorunnaarsinnejqarpoq.

Taamaalilluni 2014-imi aggustip 28-ani communalbestyrelsimit akuersissutigineqarpoq.



Hermann Berthelsen  
Borgmesteri

Matumuuna Qeqqata Kommuniani qitsuiteqarnermi ileqqoreqqusaq  
atuuttussanngortinneqarpoq.

*Namminersorlutik Oqartussat, ulloq 11 02 2015*



Karl-Kristian Kruse  
Aalisarnermut, Piniarnermut Nunalerinermullu Naalakkersuisoq